



I timps a son chei che a son, e se za si fâs fature a mandâ indenant lis iniziativas che a sburtin la lenghe furlane tal normâl, ancjemò plui merit bisugne dâ a chei cjaviestris che a no molin e a tegin bot in di di vuê.

Un di chescj al è il Comun di Spilimberc (cu la poie di ARLeF, SFF, Istitût Pre Checo Placerean e la USF) cul **concors Zâl par Furlan**, che lant di doi in doi, al è rivât a sierâ – îr di sere li dal Teatri Miot – la sô otave edizion dal Concors e a fâ la premiazion, spostade di cheste Vierte.

Un concors che al tire dongje **contis curtis di gjenar zâl, o dal sotgjenar noir, scritis par**

furlan e che in grazie di une partecipazion di rive jù al spint sedi pai premis, sedi pe publicazion periodiche des oparis, sedi par une serade di Gale, cun ospits e preparazion. Insome... tant di cjapiel e soledut, par Chei di Contecurte, un pont di riferiment e une iniziative di tignî cont.

Ve chi alore che o vin gust di contâus cemût che e je lade la serade di îr, presentade dal otim **Claudio Romanzin, che al à fat di presentadôr e letôr**, compagnât di un valet perfet (il segretari de jurie Marco Salvadori, che al à curât ancje la part organizative) e il **trio Liron-fisarmoniche-ghitare di Emma Montanari**, une vore babios e adats a la serade, cul lôr repertori di cjantis popolârs.

A son stâts premiâts i **fruts des mediis di San Denêl**, cu lis lôr contis curtis, e la sezion Video pes scuêli e à viodût un lavôr bielnon che al meteve adun il **trailer di CSI Cisterne, dut di gjoldi**.

Ma lis contis? I zâi? A jerin, a jerin... **Cuasi vincj lavôrs rivâts e 4 finaliscj**, cun contun nivel cualitatîf une vore alt, che al à fat discuti une vore la **jurie voidade di Bepi Mariuz**, e che al à viodût une classifiche curtissime,

E alore... stant che il nestri ostîr al jere presint e al à documentât dut, ve chi l'esit dal concors!

Un **ex-aequo al tierç puest**, cu lis contis:

- **L'alien di Enrico Maiero**
- **La britule cul mani di cuar di Diego Navarra**

Une conte che e fevele di un sassinament imprevedibil intai paisûts smenteâts parsore Mueç, chê altre che e va indaûr tal 1600 e nus conte di unaltri maçalizi tes barufis fra Cjarlins e Maran. E a chescj doi chi, se nus lein, o varessin ancje un invît di fâi. **Diego e Enrico... us spietìn chi in ostarie, cun cualchi conte curte!**

Al secont puest, par un nuie, la conte:

- **Amâr come la mîl di Gino Marco Pascolini**

che di pôc nus à saludât ducj e al à ricevût chest ricnognossiment postum, par une conte une vore divertente e cuntune strutture origjinâl, che e viodeve propite come sassin e protagonist nuiemancul che il president de jurie.

E ae fin, il vincidôr, che za le veve smicjade doi agns fa, al è stât propite...

IL NESTRI OSTÎR!

La conte vincidore e jere:

- **Murùs di Raffaele Serafini**

un toc storic che al tornave indaûr tal 1421, date che e viôt il cjâf di Marc di Murùs, ultin quartebandiere dal stât patriarcjin di Aquilee, taiât par opare dai venezians, cu la acuse infamant di vê dât acet a un falsari di monedis. Ma la storie e je pôc clare e cualchidun al à une gnot sole par indagâ e scuvierzi ce che al è pardabon sucedût a chel ultin sbrendul di resistance furlane, prin di colâ te vuate di Vignesie.

E l'Ostîr nus fâs savê ancje che **chest premi al è une vore contecurtic**, stant che la ispirazion e il jutori par i detais storics al è rivât di **Carli Pup**, e lis corezions par une grafie perfete e un lessic vari e no comun a son come par solit de fidade **Coghe Fuguline**. (E a proposit... viodêt che e sta par rivâ la Conte dal mês e che i doi a son in vore)

E insome... stant che o vin cheste gnove frescje di pache, us lassìn adiriture la fotografie de

premiazion, cui scritôrs mascarâts e Eros Cisilin de Arlef, e adiruture **trê mascarutis cu la Acuille furlane (blu, rosse e nere) de Friûl point** in bieles mostres!

E par cui che al vûl o metin ancje il video de leture dal judizi de jurie.

Insome... nus pâr propite une bieles gnove!



<http://www.contecurte.eu/wp-content/uploads/2020/10/leture-judizi.mp4>